

PAULİ BƏ EFESIYON NOMƏ

VƏSƏ

Pauli «Bə Efesiyon Nomə» əsosə movzu çe nomə 1:10-nə ayədəy:

«Vaxt təmom beadə isə İştə in niyəti bə vırə bərosne. Həm osmononədə, həmən zəminisə bıə har çiy Məsihi rəhbərəti jiyədə bə ico bəvarde».

Im həmçinin Xıdo bəştə xəlgi qıləy işorəy ki, əvon bə Xıdo məğsədi mıvofiğ bıjiyın iyən insonon İsa Məsihədə bə ico biyə.

Çe nomə iminə ğismədə miəllif çe Xıdo İştə xəlgi səçin kardey, çəvon qınon Deştə Zoə İsa Məsihi vositə baxşey iyən Xıdo Mığəddəsə Rufi vığandey vədi barədə qəp jəydə. Çe nomə dıminə ğismədə Paul handəkəsonku əjo kardeydə ki, çəvon Məsihədə bıə həmərəyətı bəçəvon jimoni mıvofiğ bıbu.

Paul in nomə nıvışteədə məcazi mənəədə bıə ifodon oko doydə. Imi kardeyədə məğsəd əve ki Xıdo xəlgi Məsihədə bıə ittifoği bə həmməy nişo bıkə. De jıqoy əv imoniyə icmo bə insoni andomi, Məsihi isə bı andomi səy oxşəş kardeydə. Paul bı nomədə həmçinin Məsihədə Xıdo bə insonon doə lutfi barədə vey qəp jəydə. Har çiy Məsihi mehibbətı, insonon baxşə, lutfi iyən pokiyətı nurədə nişo doə beydə.

Kitobi məzmun:

1:1-2 Səlonon

1:3–3:21 Xıdo İştə sıri Məsihədə oşko kardışe

4:1–6:20 Məsihədə tojə jimon

6:21-24 Oxonə səlonon

1

¹ *Səlonon bıbu de Xıdo rizo Məsih İsa həvari bıə az Pauliku Efesədə bə İsa Məsihi bəfomandə Xıdo xəlgi! ² Çəmə Pıə Xıdoku iyən Rəbb İsa Məsihiku bəşmə lutf iyən sulh bıbu!

Məsihədə bəmə doə bıə baxtəvərətı

³ Bəçəmə Rəbb İsa Məsihi Pıə Xıdo həmd-səno bıbu ki, de osmoni har curə ruhaniyə nemətı, de İsa Məsihi vositə bəmə bərəkət doəşe! ⁴ Əy dınyo ofəyə nıkarde bənav

*1:1 Həv.18:19-21; 19:1

əməni səçin kardışe ki, de İsa Məsihi vositə mehıbbətədə mıǵəddəs iyən Çəy navədə benoxsan bıbəmon. ⁵ Çəy sıftəku təyin kardə məǵsəd iyən xəymandə irodə ımbe ki, əməni de İsa Məsihi vositə Boştə fərzənd ǵəbul bıkə. ⁶ Bıdə Deçəy azizə Zoə vositə bəmə bəxş kardə lutfi izzət mədh kardə bıbu. ⁷ *Bəçəy bolə lutfi qorə əmə Deçəy Zoə xuni vositə ozod bimon iyən çəmə qınon baxşə bin, ⁸ ımı hıkmət iyən şınemonədə de mıbofəti bəmə doşe. ⁹ Xıdo de Məsihi vositə icro bıə İştə sır oqətə xəymandə niyəti oşko kardışe. ¹⁰ Vaxt təmom beədə isə İştə ın niyəti bə vırə bərosne. Həm osmononədə, həmən zəminisə bıə har çiy Məsihi rəhbərəti jiyədə bə ico bəvarde.

¹¹ Oxo Deştə irodə iyən məǵsədi əməni navo təyin kardəşe iyən har çiy icro kardışe ki, Məsihədə varis bıbəmon. ¹² Əmə bə Məsihi iminə umu bastə odəmon dılədə bə Xıdo izzət doə odəmon bıbəmon. ¹³ De həǵıǵəti kəlomi vositə şımə ıştə xılosi Şoyə Xəbə məsəone. İmon vardıone bə Məsihi, de vəd kardə bıə Mıǵəddəsə Rufi bəşmə mıhi jə be. ¹⁴ Mıǵəddəsə Ruf bə Xıdo məxsus bıəkəson ozod beyro boşmə irsi doə bıə zəmonəte. De jıqoy Çəy izzəti mədh bıkəmon.

Pauli bo imoniyon dıvo

¹⁵ Əve azən şımə bə Rəbb İsa bıə imoni iyən bə Xıdo xəlǵi bıə mehıbbəti məsəədə ¹⁶ ıştə dıvonədə şıməni bə yod dənoydəm, hejo boşmə bə Xıdo şukur kardəm. ¹⁷ Dıvo kardəm ki, çəmə Rəbb İsa Məsihi Pıə bıə izzətinə Xıdo bəşmə hıkmət iyən vəhy doə rufi ənom bıdə ki, şımə fame bızınən Əy. ¹⁸ *Bıdə Əv şımə dılon ruşin bıkə ki, şımə Çəy dəvətiku bə əməl omə umu, bə Xıdo xəlǵi doə bıə irsi bolə izzəti vınde bızınən. ¹⁹ Çəy yolə ǵıvvə fəoliyətiro imon vardə bəməhon sərf kardə ǵudrəti behəddəti bıvındən. ²⁰ Xıdo de ın ǵudrəti jıqo fəoliyət nişo doşe, bəyji kardışe Məsihi mardeyku, nışandışe osmonədə İştə rostədə. ²¹ Əncəx bı dovrədə ne, həmçinin oməvədən çe har səkkə, hakimi, ǵıvvə iyən əǵəsən barz kardışe Əv. ²² Tabe kardışe har çiy Bəy dəǵandışe Bəçəy po. Çe har çiy səpe sər beyro bə imoniyon icmo doşe Əv. ²³ In icmo Çəy andome iyən həmməyəvo qırd əhotə kardə mıkəmmələtiye.

2

Mardiku bə jimon ovaştey

¹ Şıməhon bəştə taxsıron iyən qınonro ruhən mardəbişon, ² bı bevəcə dınyo mıvofiǵ iyən osmoni jiyədə bıə şəri, yəni esətən bə Xıdo itoət nıkardə insonon idorə kardə rufi hıkmronəti jiyədə, qınon dılədə jimon kardeydəbişon. ³ Oxo əmənen bəştə cismoniyə təbiəti mıvofiǵ jiyeydəbimon, ıştə andomi iyən aǵılı piyəyon həmməyəvo bə vırə rosneydəbimon. De jıqoy bənə bı dınyo insonon bə Xıdo ǵəzəbi duço bıəbimon.

⁴ İntasi bolə mərhəmətinə Xıdo əməni de yolə mehıbbəti piyəyro, ⁵ bəştə taxsıronro mardə bıə bə əməhon de Məsihi ivirədə jimon doşe. Şımə Deçəy lutfi xılos bıyon! ⁶ Xıdo de Məsih İsa ivirədə əməni bəyji kardışe, osmononədə nışandışe. ⁷ İmi kardışe

*1:7-8 Kol.1:14

*1:18-20 Zəb.110:1

ki, oməvonədən de Məsih İsa vositə İştə xəymandə lutfi behəddə mıbofəti bəmə nişo bıkə. ⁸ Oxo şımə de imoni vositə xılos biyon. Im şımə əməlonku nibe, çe Xıdo lutfe, ⁹ de əməlon ni ki, hiçki boştə şəhn nıkə. ¹⁰ Oxo əmə de Məsih İsa vositə çe Xıdo ofəyə xilqətimon ki, navo hozı kardə bıə çokə əməlonro bijiyəmon.

Çe Xıdo tojə icmo

¹¹ Əve ki bəştə yod biyən, vaxt hestbe şımənən bitpərəst biyon. Cismən sinnət kardə bıə odəmon şıməni «besinnət» zıneydəbin. ¹² Bə vaxti şımə Məsihiku co biyon, İsraili icmoku bə kəno biyon, Xıdo vədon boşmə nıbin, dınyoədə beumu iyən Xıdoku məhrum biyon. ¹³ Əmma bə Məsihi imon vardə şıməhon vaxt hestbe Məsihiku diyəro bişon, esət de İsa Məsihi xuni vositə nez biyon.

¹⁴ *Oxo Məsih İştən ojçəvone boəmə. Əy i kardışe har dı tərəf, yəni Yəhudiyon de bitpərəston iyən əməni iyəndıku esındiniyə divo gəzinə bıə ədovəti, Deştə andomi gırbon doy vositə gəndışe. ¹⁵ Gəruni əmron iyən gəydon həmməyəvo ləgv kardışe ki, İştənədə qıləy tojə inson ofəyeyro har dı tərəfi aştı bıkə ¹⁶ iyən de çomexədə marde vositə har dıqləyni i andomədə de Xıdo aştı bıkə. Əy Deştə marde ni kardışe ədovət. ¹⁷ *Əv oməy, pevılo kardışe aştı barədə bıə ın Şoyə Xəbə, həm diyəroədə bıə bəşmə, həmən bə neziyədə bıkəson. ¹⁸ Əve ki har dı tərəfədə bıə əməhon Deçəy vositə i Rufədə bə Pıə huzur beşe zıneydəmon. ¹⁹ De jıqoy həni açın iyən gərib nişon, şımə de Xıdo xəlgi ivirədə çe Xıdo xıyzoni uzvonışon. ²⁰ Həvariyon iyən peyğəmbəron noə bınəçə səpe dutə bıəşon, bınəsiğ isə Məsih İsa İştəne. ²¹ Bina həmməyəvo Çəy səpe ejə beydə, bə Rəbbi aid bıə mıgəddəsə məbəd rost kardə beydə. ²² Şımənən Çəy səpe de Rufi vositə bo Xıdo Rufi jiyə məskən beyro dutə beydəşon.

3

De vəhyi vositə bə Pauli oşko kardə bıə sır

¹ Əve ki Məsih İsa xıdmətəvon bıə az Paul, mıxtəlifə millətono bıə şıməhonro esət dustəg eqınim. ² Həlbəttə şımə məsəyone ki, Xıdo boşməno bəmı asbardə Çəy lutfi bəşmə bırosnım. ³ Xıdo İştə siri de vəhyi vositə oşko kardışe bəmı, bı barədə petono bəşmə kırt nıvıştıme. ⁴ *Çımı bəşmə nıvıştəyon handeədə səbərəseşon ki, az Məsihi sır bıə Şoyə Xəbə çoknə sərəsəym. ⁵ In sır sıftənə nəsilon vaxtonədə bə bəşəriyəti oşko votə bıənibe. Esət Rufi okardışe bə Məsihi mıgəddəsə həvariyon iyən peyğəmbəron. ⁶ Sır ıme ki, mıxtəlifə millətono bıə odəmonən de Məsih İsa iyən Şoyə Xəbə vositə de İsrail xəlgi ivirədə irsi səy bəzınen. Əvonən deyəmə iqlə andomi uzvonin iyən bə eyni vədi xanbozin.

⁷ Xıdo Deştə gıdrətinə fəoliyəti İştə lutfi bəmı doşe, Şoyə Xəbə pevılo karde xıdməti bəmı asbardışe. ⁸ Az ən bedəqərinə odəmim Xıdo xəlgi dılədə. İntasi Xıdo ın lutfi

***2:14-16** Kol.1:19-20; 2:14

***2:17** Yeş.57:19

***3:4-6** Kol.1:25-27

bəmı doşe ki, Məsihi bə ağıl dənıvıjıyə mıbofəti barədə bıə Şoyə Xəbə bə bıtpərəstə xəlğon bırosnım. ⁹ Har çiy ofəyə Xıdo har kəsiku niyoni oqətə ın sıri niyəti bo insonon həmməy oşko bıkəm. ¹⁰ Jıqoən, çe Xıdo hartərəfə hikmət esət de imoniyə icmo vositə bə osmonədə bıə səkkon iyən hakimon votə bıbu. ¹¹ Xıdo İştə zolə məğsədi deçəmə Rəbb Məsih İsa vositə bə vırə rosnişe. ¹² De Məsihi ivirədə iyən Bəy bıə imoni vositə əmə de ciqə iyən etibo bə Xıdo nez beydəmon. ¹³ Bı səbəb əjo kardəm ki, çımı boşməno kəşə əzyətonro rufə eməqınən. Im boşmə qıləy fəxre.

Sərəsən bə Məsihi mehıbbəti

¹⁴⁻¹⁵ Bı səbəb az osmononədə iyən zəminisə bıə har ofəyevoni səvon iyən ocon vardo Pıə vədə dıvoədə dəzıno omeydəm ki, ¹⁶ Əv Bəştə bolə izzəti qorə Deştə Rufi vositə şımə dılətonədə bıə rufi ğoym bıke ¹⁷ iyən Məsih de imoni şımə dılətonədə bıjıyı. Şımənən mehıbbətədə rəğ-rişə bıjənən, bıne bıqətən. ¹⁸ Jıqoən, şımə de Xıdo xəlği ivirədə Məsihi mehıbbəti çanədə qeş, dıroz, bılınd iyən nığıl bey sərəse bızınən, ¹⁹ har ağılisə barz bıə ın mehıbbəti fame bızınən. Jıqoən, şımənən bə Xıdo kamiləti molik bıbən.

²⁰ İzzət bıbu bə Xıdo ki, bəmənədə fəoliyət nişo doydə, de ğudrəti çəmə piyə iyən şınəyonsə ziyodəy bo karde ğadire. ²¹ İmoniyon icmoədə iyən de Məsih İsa vositə nəsilbənəsıl zolə izzət bıbu bə Xıdo! Amin.

4

Andomi ibeyəti

¹ De jıqoy Rəbbi roədə dustəğ eqıniyə az, bəşmə lovə kardəm ki, bəştə sə dəvəti mıvofiğ jimon bıkənən. ² Har cəhəto itoətkor iyən həlim bıbən. Bə iyəndı səbrin bıbən, de mehıbbəti petovən. ³ Ruhədə ibeyəti de sulhi nığo doyro həkəm bıbən. ⁴ Xıdo de iqlə umu şıməni sədo kardışe. İqlə andom iyən iqlə Ruf, ⁵ iqlə Rəbb, iqlə imon, iqlə vəftiz, ⁶ çe həmməy Xıdo iyən Pıə iqləye. Çe həmməy səpe bıəy, de həmməy iyən həmməyədə bıəy Əve.

⁷ Məsihi boəmə təyin kardə ğədərədə bəçəmə har qıləyni xısusiyə ənom doə bıə. ^{8*} Əve jıqo votə beydə:

«Əv de ğələbə bə ərş rost beədə əsiron Deştə bardışe,
Bə insonon baxşon doşe».

⁹ Bəs ın «rost be» sıxani mənə çıçe? Əncəx ə mənə doydə ki, Məsih sıftə bə jıtonon, bə zəmini ji evoəbe. ¹⁰ Evoəkəsən Əve, aləmi Deştə huzuri purkardeyro bə ərş rost bıəkəsən Əve. ¹¹ Əy İştən ənom doşe bə kiysə həvari, bə kiysə peyğəmbər, bə kiysə Şoyə Xəbə pevılo karde, bə kiysə icmo rəhbərəti iyən mıəlliməti ki, ¹² Məsihi andomi inkişofiro xıdmət bıkən, Xıdo xəlği hozı bıkən. ¹³ Çımı səkiştədə əmə həmməy imonədə yol bəbemon iyən Xıdo Zoə zıneyədə i bəbemon, Məsihədə bıə bə mıkəmmələ insoni səviyə bərəsemon. ¹⁴ De jıqoy əmə həni bənə əğili məbəmon,

*4:8 Zəb.68:18

insonon əməni de curbəcurə təlimi vavazi dəniğandın, bə insonon hiləbozəti bove məkəmon, bəçəvon tələ eməqınəmon. ¹⁵ Bərəks, həğiğəti de mehıbbəti icro bıkəmon, andomi Sər bıə bə Məsihi oxşər beyro hartərəfə inkişof bıkəmon. ¹⁶ Həmə andom Deəy i beyro de har bandənə koməqi anqıl beydə Bəy, har uzv de iyəndı əloğəyn be-be, de mehıbbəti inkişof kardeydə.

Kanə jimon iyən tojə jimon

¹⁷ De jıqoy Rəbbi nomo voteydəm iyən çəşnavi kardeydəm ki, şımə həni bıtpərəston gəzinə de puçə fikron jimon məkən. ¹⁸ Toyki eqətəşe çəvon ağılı iyən nodonətiku, çəvon dilon kurocəğ beyro Xıdo jimoniku diyəro eqının. ¹⁹ İştə hissiyoti qın kardışone, de beəxloğəti, de hərisəti har curə mırdolə koon kardışone. ²⁰ Şımə esə boy dərk kardıyone Məsih ki, bənə bəvon nıjiyən. ²¹ Həlbətən, şımə İsa barədə məsəone, həğiğəti omutəone, oxo həğiğət İsadəy. ²² Bı təlimi mıvofiğ bəştə sıftənə jimoni məxsus bıə de dast dəğandə ehtiroson dəqordınıyə bıə kanə təbiəti bə kəno şodən, ²³ ruhən iyən aqlən nu bıbən, ²⁴ dəqətən ıştəni de əsl salehəti iyən mığəddəsəti, Xıdo surətədə ofəyə kardə bıə tojə inson bıbən.

²⁵ Əve ki har curə duyəvojəti bə kəno şodən, har kəs bəştə hamsiyə həğiğəti bıvotı, çumçıko əmə həmməy iqlə andomi uzvonimon. ²⁶ Ğıyzın beədə qıno məkən. Bıdə şımə ğıyz həşi enişə sardın bıbu, ²⁷ bə iblisi firsət mədən. ²⁸ Dızdi kardəkəs həni dızdi nıkə, bərəks, deştə daston zəhmət bıkəşi çokə koon bıkə ki, bə ehtiyoc bıəkəson paybaxş kardeyro bıbuşe jıçıy. ²⁹ Şımə qəvo hiç qıləy yavə sıxan benıšu, əmma lozim beədə foydəynə sıxanon bıvotən ki, məsəkəson lutf bıstənin. ³⁰ *Çe Xıdo Mığəddəsə Rufi kədərın məkən. Bo xılosi de həmon Rufi bəşmə mıhi jə be. ³¹ Bıdə har curə kin iyən zəhə, rık, ğıyz, zıkıvu, lənət həmməyəvo şıməku diyəro bıbu. ³² Əmma xəymand iyən rəhmin bıbən bə iyəndı, Xıdo de Məsihi vositə şıməni baxşe gəzinə şımənən iyəndı bıbaxşən.

5

Xıdoku nımunə peqətən

¹ De jıqoy Xıdoku nımunə peqətən, oxo şımə Çəy azizqiromiyə fərzəndonişon. ² Məsihi çoknə piyəşe əməni, İştəni fido kardışe boəmə xoşbuyə təğdim iyən ğırboni gəzinə bə Xıdo, şımənən jəqo, mehıbbətədə jimon bıkən. ³ Beəxloğəti, har curə mırdoləti iyən taməkorəti barədə hiç sıxan nıbu şımə arədə, imon bə Xıdo xəlği dameydənin. ⁴ Beədəbətəti, heyvərəti iyən hoziyə zərfəton nıbun. İmon bəşmə danıbomen. Çımi əvəzi bıdə şukur bıbu. ⁵ Həlbətən, zıneydəşon ki, hiç qıləy beəxloğ, mırdol, yaan bıtpərəsti gəzinə bə har çiy həris bıə taməkorə odəm Məsihi iyən Xıdo Podşoəti irs səy nıbəzıne.

⁶ Bıdə hiçki de puçə sıxanon şıməni bə dast dəniğandı. Oxo imon itoət nıkardə odəmon səpe çe Xıdo gəzəbi vardeydən. ⁷ Əve gətıyən xanboz məbən deyəvon. ⁸ Vaxt

*4:30 Yeş.63:10

hestbe şımənən zılmotədə jimon kardeydəbiyon, esət həni şımənən Rəbbədə nuriyon. Əve nurinə fərzəndon ğəzinə jimon bıkən. ⁹ Oxo nuri səməərə çokiyəti, salehəti iyən həğiğətə. ¹⁰ Cəhd bıkən Xıdo rozi haştə çiyon bo zıne, ¹¹ toykiədə jiyəkəson besəmərəynə əməlonədə iştirok məkən. Bərəks, imoni ifşo bıkən. ¹² Toykiədə jiyəkəson kardə niyoniyə əməlon hətto voteyən aybe. ¹³ Niyoni bı har çiy nurədə oşko beydə, ¹⁴ nur har çiy oşko nişo doydə. Bı səbəb jıqo votə beydə:

«Ha hıtəkəs, pebi iyən
bəyji bibi çe mardon dılədə!
Məsih nur səbəğande ıştı səpe».

De Rufi pur bıbən

¹⁵ De jıqoy bəştə jimoni dığğət bıkən, mudrikəti məhrum bıəkəson ğəzinə məbən, bənə mudrikon jimon bıkən. ¹⁶ Har qıləy firsəti oko bıdən, bevəcə zəmonəye. ¹⁷ Bı səbəb beağıl məbən, Rəbbi irodə bıfamən. ¹⁸ Sərxoş məbən de çəxırı, ım şıməni bə beəxloğəti bəbarde. Bərəks, de Rufi pur bıbən. ¹⁹ Məzmuron, himnon iyən ruhaniyə mahneyon bahandən icmoədə, ruhaniyə musiqi bijənən iyən dılisıxtə ilahi bahandən bo Rəbbi. ²⁰ Deçəmə Rəbb İsa Məsihi nomi har vaxti iyən bo har çiy bə Pıə Xıdo şukur bıkən.

Merd iyən jeni arədə bıə mınosibəton

²¹ Bə Məsihi ehtiromi loyiğ bə iyəndı tabe bıbən.

²² Ha jenon, bə Rəbbi tabe bey ğəzinə bəştə şuyon tabe bıbən. ²³ Çumçıko andomi Xıloskor bıə Məsih çe imoniyon icmo Sə bey ğəzinə, şuyən jeni səye. ²⁴ Çoknə ki icmo tabeye bə Məsihi, jenonən har çiyədə bəştə şuyon tabe bıbun.

²⁵ Ha şuyon, çoknə Məsihi piyəşe imoniyon icmo, İştəni boəy fido kardışe, şımənən ıştə jenon bıpiyənen. ²⁶ Məsih ımı kardışe ki, icmo de ovi iyən kəlomi vositə bışıştı təğdis bıke. ²⁷ De jıqoy vəyu ğəzinə bəvədə hiç qılə ləkə, pecuc, yaan co qıləy noxsan nıbu, əy izzətin, mığəddəs iyən benoxsan bekə Bəştə huzur. ²⁸ Şuyonən eyni curə ıştə andomi ğəzinə piyəninin ıştə jenon. Harki piyeydəşe ıştə jeni, əy piyeydəşe ıştəni. ²⁹ Oxo hiç kəs hiç vaxti bəştə andomi nifrət əkəni. Bərəks, ıştə andomi perosneydə, bəçəy ğəyd mandeydə, çoknə ki Məsih bə icmo ğəyd mandeydə. ³⁰ Oxo əmə Çəy andomi uzvonimon.

³¹ * «Bı səbəb şuyə tərq bəka ıştə pıə-moə, umuj bəbe bəştə jeni iyən i andom bəben dıynənən».

³² In sır yole, az ımı bə Məsihi iyən icmo arədə bıə mınosibəti aid kardeydəm.

³³ Həmçinin şıməhonədən har merd bənə ıştəni bıpiyişe ıştə jeni, jen isə ıştə şuyə hurməti oqəti.

6

Yolon iyən rukon arədə bıə mınosibəton

*5:31 Ofə.2:24

¹ *Ha fərzəndon, bə Rəbbi məxsus beyro bəştə pıə-moə itoət bıkən. Şımə imi kardəninişon. ² Vəd doə iminə əmr ime: «Bəştə pıə-moə hurmət bıkə ki, ³ dınyoədə hərəbaxtə jimonı bıbu iyən dırozə umr bıkəy».

⁴ *Ha pıəon, şımənən ıştə fərzəndon rıkin məkən, əncəx de Rəbbi tərbiyə iyən nəsyəti əvoni yol bıkən.

⁵ Ha ğulon, bəştə dınyoədə bıə əğon de tars-larzi iyən dılisıxto itoət bıkən, çoknə ki bə Məsihi itoət əkeyon. ⁶ Imi, insonon rozi haşteyro bə çəşi çok çiyə de xıdməti məkənən, Məsihi ğulon ğəzinə dılisıxto Xıdo irodə bə vırə rosnıyero bıkənən. ⁷ Bə insonon ne, bə Rəbbi xıdmət karde ğəzinə dılisıxto xıdmət bıkən. ⁸ Bızınən ki, Xıdo har kəsi çokə koyro bəy mıkofot bədo, hiç qıləy fərgə nişe, ğul bıbu, yaan ozodə inson.

⁹ Ha əğon, şımənən həmçinin deştə ğulon jıqo rəftor bıkən. Həni hədə məvoən bəvon. Bızınən ki, çəvonən, şımənən Əğə osmonədəy iyən Əv insonon arədə tərəfkeşəti nıbəkarde.

Çe Xıdo doə ruhaniyə zireh iyən avjoron

¹⁰ Mılxəs, ıştəni de Rəbbi iyən Deçəy yolə ğıvə ğoym bıkən. ¹¹ Bə iblisi hilon vəynə mandeyro Xıdo bəşmə doə həmə zirehi iyən avjoron tankardənən. ¹² Çumçıko çəmə mıborizə xun iyən qujdo iborət bıə insonon vəynə ne, bə şəri Səkkon iyən Hakimon, bə zılmoti hıkmoron, osmonədə bıə ruhaniyə şərə ğıvvon vəynəye. ¹³ Bı səbəb çe Xıdo həmə zireh iyən avjoron peqətənən ki, bevəcə rujədə, mığovimət nişo bıkən, har çiy bıkən, vəynə mande bızınən. ¹⁴ *De jıqoy həğiğəti kıştı ğəzinə dəbastən bəştə peşti, salehəti zireh ğəzinə bijənən bəştə sinə. ¹⁵ Aşti vardə Şoyə Xəbə bə dınyo rosnıyero məşobətan hozı bımandən. ¹⁶ Dımon ivirədə çe Şər bıəy ğandə həmə yəlovinə tiyon okışteyro imoni ğalxəni bəştə dast peqətən. ¹⁷ Xılosi toskılo iyən Rufi şımşı, yəni Xıdo kəlomi peqətən.

Dıvo-səno iyən səlom vığandey

¹⁸ Hejo de Rufi idorə dıvo bıkən, bə Xıdo lovə bıkən. Bı məğsədi roədə qırd sərhısob bıbən bo Xıdo xəlği həmməy, de həkəmi dıvo bıkən. ¹⁹ Bominən dıvo bıkən ki, har səfə az ıştə qəvi okardeədə Xıdo bəmi loziminə sıxan bıdə iyən az Şoyə Xəbə sıri ciqəmand bəyon bıkəm. ²⁰ Az hətto zincirədə bıbomən çəy daynəm. Dıvo bıkən ki, az ciqəmand iyən bərmalə bəyon bıkəm, ıştə vəzifə bə vırə bırosnım.

²¹ Zıney piyeydone az çoknə jıyeydəm iyən çiç kardeydəm? Bı barədə bə Rəbbi xıdmət kardə çımı azizqiromiyə imoniyə boə iyən bəfomandə xıdmətəvon Tıxik bəşmə bəvote. ²² Az de ın məğsədi əy şımə tonu vığandime ki, şımə çəmə barədə bızınən iyən əv bəşmə dılvandı bıdə.

²³ Pıə Xıdo iyən Rəbb İsa Məsihiku sulh iyən de imoni mehıbbət bıbu bə imoniyon!
²⁴ Xıdo lutf bıbu çəmə Rəbb İsa Məsihi de zolə mehıbbəti bə piyəkəson həmməy!

***6:1** Kol.3:20

***6:4** Kol.3:21

***6:14-15** Yeş.52:7; 59:17